




ՀԱՂՈՐԴԱԳՐՈՒԹՅՈՒՆ

Սույն թվականի հոկտեմբերի 23-ին, կիրակի օրը, Ամենայն Հայոց Կաթողիկոս Ս. Տ. Վապգեն Ա Վեհափառ Հայրապետը Էջմիածնի Մայր տաճարում սրբալույս մեռնի օծմամբ եպիսկոպոս ձեռնադրեց Մայր Աթոռի միաբան երեք վարդապետներին՝ համաձայն կարգաց և կանոնաց Հայաստանյայց Առաքելական Սուրբ Եկեղեցու:

Ձեռնադրված հոգևորականներն են՝

1. Տ. ԳՐԻԳՈՐԻՍ ԵՊԻՍԿՈՊՈՍ ԲՈՒՆԻԱԹՅԱՆ՝ Արգենտինայի հայոց թեմի վրա, իբրև թեմակալ առաջնորդ, ծնյալ 1946 թ. Էջմիածին քաղաքում:

2. Տ. ԳԱՐԵԳԻՆ ԵՊԻՍԿՈՊՈՍ ՆԵՐՍԻՍՅԱՆ՝ Արարատյան հայրապետական թեմի վրա, իբրև առաջնորդի փոխանորդ, ծնյալ 1951 թ. Էջմիածնի շրջանի Ոսկեհատ գյուղում:

3. Տ. ԱՆԱՆԻԱ ԵՊԻՍԿՈՊՈՍ ԱՐԱԲԱՋՅԱՆ՝ Ադրբեջանի հայոց թեմի վրա, իբրև թեմակալ առաջնորդ, ծնյալ 1951 թ. Երևան քաղաքում:

Ձեռնադրությունը կատարվեց խարտավիակությամբ Մայր Աթոռի միաբան Ս. Արսեն եպիսկոպոս Բերբերյանի: Ամենայն Հայոց Կաթողիկոսի կողքին ընթերակա եպիսկոպոսներ էին՝ Ռոմինիայի և Բուլղարիայի հայոց թեմերի առաջնորդ Տ. Տիրայր արքեպիսկոպոս Մարտիկյանը և Իրաքի հայոց թեմի առաջնորդ Տ. Ավագ եպիսկոպոս Ասատուրյանը:

Պատշաճ հանդիսավորությամբ տեղի ունեցած սրբալույս արարողություններին ներկա էին ուխտավորաբար Մայր Աթոռ ժամանած թեմական իշխանությանց ներկայացուցիչներ, Գերագույն Հոգևոր Խորհրդի անդամներ և հավատացյալ ժողովրդի հոծ բազմություն:

Ձեռնադրության արարողությանը ներկա էր նաև Հայկ. ՍՍՀ Մինիստրը-

ների խորհրդին առընթեր Հայ Եկեղեցու գործերի խորհրդի նախագահի տեղակալ Անդրանիկ Հասարայանը:

Հոկտեմբերի 30-ին, կիրակի օրը, նորապսակ եպիսկոպոսները իրենց ուխտի պատարագը մատուցեցին Էջմիածնի Մայր տաճարում և Երևանի Ս. Սարգիս ու Ս. Հովհաննես եկեղեցիներում և հաջորդող օրերին մեկնեցին իրենց թեմերը՝ տանելով իրենց հոտին Վեհափառ Հայրապետի ողջույններն ու օրհնությունները Մայր Աթոռ Սուրբ Էջմիածնից:

Հոկտեմբերի 16-ին, կիրակի օրը, Ամենայն Հայոց Հայրապետի հրամանով Ս. Էջմիածնի Մայր տաճարում, ձեռամբ Մայր Աթոռի դիվանապետ Գերաշնորհ Տ. Ներսես եպիսկոպոս Պոպապայանի, կուսակրոն քահանա ձեռնադրվեցին հոգևոր ձեռնարանի ընթացավարտ սարկավագներ Խաչիկ Խարապյանը, ծնյա 1958 թ. Հալեպ քաղաքում, Սմբատ Արիստակեսյանը, ծնյա 1959 թ. Էջմիածնի ջրջանի Հայթաղ գյուղում, և Վարդան Բաղդասարյանը, ծնյա 1961 թ. Հրապ-դանի ջրջանի Մեղրաձոր գյուղում՝ վերանվանվելով Տ. Թորգոմ, Տ. Ասողիկ և Տ. Շնորհք կուսակրոն քահանաներ:

Նույն օրը, երեկոյան, Մայր տաճարում ձեռնադրիչ սրբական հայրը նոր-ընծա Տ. Թորգոմ, Տ. Ասողիկ և Տ. Շնորհք քահանաներին, համաձայն իրենց կատարած ուխտի, աբեղայական վեղարներ շնորհեց:

Թող Տերը քաղցրությամբ ընդունի նորապսակ սրբական և հոգեշնորհ հայրերի ուխտն ու ընծայումը:

ԴԻՎԱՆ ՄԱՅՐ ԱԹՈՒԻ

Ս. Էջմիածին,

1 նոյեմբեր 1983 թ.

